



UPA2019/48

25.04.19

Aqqa Samuelson

**FN-ip inuit innarluutillit pisinnaatitaaffii pillugit aalajangersagaanut Nunatta malitsisinissaa qulakkeerniarlugu nuna tamakkerlugu iliuusissatut periusissiamik kingusinnerpaamik UPA 2020-mi saqqummiunneqartussamik Naalakkersuisut suliaqarnissaat pillugu Inatsisartut aalajangiiffgisasasattut siunnersuut.**

(Inuit Ataqatigiit Inatsisartuni ilaasortaataat)

Siunnersuuteqartunut qujalluta, siunnersuummut Inuit Ataqatigiit ima oqaaseqassapput:

Naalagaaffiit Peqatigiit inuit innarluutillit pisinnaatitaaffii pillugit Nunatta peqataalerneratigut pisussaaffinnik immikkoortunik arlalinnik naammassiniagassaqpugut. Naalagaaffiit Peqatigiit inuit innarluutillit pisinnaatitaaffii Nunatta malitsisinissaanut qulakkeerinninnissamut Nuna tamakkerlugu iliuusissatut periusissiaq piviusunngortitseqataasinnaasutut isigaarput.

Inuit innarluutillit atugarisaat pitsanngorsaaffiginiarlugit pisortat, namminersortut susassaqtullu akunnerminni siunissamut iliuuserisassanik suleqatigiillutik pilersaarusoqatigiittariaqarput.

Inuit Ataqatigiit inuit innarluutillit pillugit iliuusissatut periusissiamik siunnersuuteqarnermikkut Nunatsinni "nukiit ataasiulersinnerisigut" kivitseqatigiinnissamut periarfissamik tikkuussaqpugut.

Inuit innarluutillit ulluinnarni atugarisaat ullumikkornit pitsaanerulissappata naalakkersuineramik suliaqartuusugut aaliangiinnissamut tunuarsimaarata iliuusissatullu periusissiortoqarnissaanut alloriaqqittariaqalartugut Inuit Ataqatigiit isumaqarput.

Innuttaaqativut inuit innarluutillit inatsisitigut inuttut allatuulli pisinnaatitaaffeqartut Nunatsinni pisortat namminersortullu ingerlataanni, inuit innarluutillit namminerisaminnik angerlarsimaffeqarsinnaatitaanerat eqqarsaatigalugu illorsualiortiternerni illuliortiternernilu inissaqarluartinneqarlutik misigisimalernissaat pinngitsoorneqarsinnaangilaq, pingaartumik Nunatsinni illoqarfinni nunaqarfinnilu tamani.

Assersuutitut ulloq unnuarlu nammineq angerlarsimaffigisamut, inuussutissarsiutunik ingerlatsivinni, niuertarfinni allarpassuarnilu innuttaasut katerittarfiini inuit innarluutillit aporfissaqaratik ajornaannerusumik pisariitsumillu periarfissaqartitaasariaqarput.

Unammilligassat annertuut inuit innarluutillit pillugit siunissamut ukiorpassuarnilu piujuartussamik iliuusissatut periusissiortoqarnissaanut isumaqataalluinnarnerput naqissuserusupparput.

Tassami iliuusissatut periusissiorneq oqaluinnarnerunani ulluinnarni inuit innarluutillit atugarisaat qanimut tikillugit timitalimmik suleqatigiittariaqarnitsinnik iliuseqartariaqarpugut, inuit innarluutillit ulluinnarni inuuniarmi, ilinniartitaanermi, inuussutissarsiornermi aningaasarsiornermilu atugarissaarnikkut ineriartornissaat pingaaruteqarmat.

Nunatsinni assigiinngisitaartuunitsivut nukerujussuarmik peqarnerput uppersarsinnaavarput. Inuit innarluutillit inuiaqatigiinni kivitseqataalluartut atorfissaqartippavut, neriummillu peqarluta kikkunnik tamanik inissaqartitsiffiusumi inuunissarput pingaartillugu.

Inuit innarluutillit inuiaqatigiinni sunniuteqarsinnaanissamut pingaartitsisuupput. Nuannaalersitsisarput, ulluinnarnilu inuunermi qiimmassaajuartuullutik.

Siunnersuummi inuit innarluutillit atugarisaasa tungaatigut sulii nangittumik iliuseqartuarnissamik oqariartortoqarnera tapersersorneqartariaqarpoq.

Tiliuq ukiup ataatsip missaani atuutereerluni maangamut sunniutai malunnarsereerput, nipilu ersarisoq inuiaqatigiinnut anillattoq nuannaarutigeqaarput tigulluarlugulu. Tiliuq inuit innarluutillit pillugit oqariartuutigisartagai tusaaniartariaqarpavut, tassanngaanniillu suleqataalluta timitalersueqataallutalu.

Inuit innarluutillit pillugit inatsit atuuttussanngortinneratigut pitsanngorsaataasussat aallartisarneqassapput. Taamaattorli iliuusissatut periusissiornikkut inatsisip "qiteraliisa ataqatigiinneri" nukiit pigisagut atorlugit katigulluarneqartariaqartut isumaqarpugut. Inuit innarluutillit pisinnaatitaaffii qulakkeerniarlugit Nuna tamakkerlugu iliuusissatut periusissiornikkut susassaqtut tamaasa nammaqatigiimmik ingiaqatigiisilernissaat qulakkeertariaqarparput.

Taamatut oqaaseqarluta siunnersuut tamakkiisumik taperserlugu, akuerineqarnissaa innersuullugu Ataatsimiititaliamut susassaqtumut ingerlateqqipparput.